

KERUSI PROFESOR YUSOF ISHAK

Staf Hospital Mt. Alvernia bantu kumpul dana

► NUR DHUHA ESOOF

nurdhuha@sph.com.sg

HOSPITAL Mount Alvernia membantu usaha mengumpul dana bagi Kerusi Profesor Yusof Ishak Dalam Sains Kemsosyarakatan di Universiti Nasional Singapura (NUS) dengan melancarkan kempennya sendiri bagi dana itu.

Kempennya itu dilancarkan selepas acara berjalan kaki sempena ulang tahun ke-54 hospital itu semalam, yang disertai Setiausaha Parlimen (Kesihatan merangkap Pengangkutan), Profesor Madya Muhammad Faishal Ibrahim.

Usaha itu dijalankan secara dalaman menerusi kakitangan hospital itu dengan sasaran mengumpul \$24,000 sebelum Julai.

Dr Faishal berkata beliau tersentuh dengan niat hospital menjadi sebahagian daripada usaha mengumpul dana itu.

Usaha oleh hospital swasta berasas agama Katolik itu merentas sempadan budaya dan agama, ujar beliau.

Ketua Pegawai Eksekutif (CEO) Hospital Mount Alvernia, Encik Lee Suen Ming, berkata: "Sangat menggalakkan apabila mengetahui bahawa sokongan praktikal yang kami sediakan hari ini akan memberi



SAMBUT ULANG TAHUN KE-54 HOSPITAL MOUNT ALVERNIA: Dr Faishal (berbaju merah) bersalaman dengan peserta acara berjalan kaki anjuran Hospital Mount Alvernia semalam. – Foto KHALID BABA

manfaat kepada kerja kajian dan pengajaran profesor dalam lebih memahami kepelbagaiannya budaya dan etnik bagi masyarakat inklusif dan progresif."

Penubuhan Kerusi Profesor Yusof Ishak salah satu daripada tiga penghormatan pemerintah bagi presiden pertama Singapura, Allahyarham Yusof Ishak, yang diumum Perdana Menteri Lee Hsien Loong dalam ucapan

Rapat Hari Kebangsaan tahun lalu.

Dua lagi ialah penamaan sebuah masjid baru di Woodlands sebagai Masjid Yusof Ishak dan penamaan semula Institut Pengajian Asia Tenggara (Iseas) sebagai Iseas-Institut Yusof Ishak.

Kempen mengumpul dana bagi Kerusi Profesor itu diterajui Jawatankuasa SG50 Kita, ja-

watankuasa bertanggungjawab menyelaras sumbangan masyarakat Melayu/Islam kepada sambutan ulang tahun ke-50 Singapura (SG50).

Sebanyak \$2.4 juta diharap dapat dikumpul daripada semua lapisan masyarakat.

Setiap dolar yang dikumpul akan ditokok sebanyak 1.5 kali oleh pemerintah bagi menjadikan jumlah keseluruhan \$6 juta.